

# Aithisg Bhliadhnail an Runaire

Le

DOMHNALL GRANN.

So an t-ìomradh a thug Rùnaire Comunn Gallda Dhuisdeil Mhóir agus Dhuisdeil Bhig—no an t-ìomradh bu mhath leis a thoirt—do na buill aig a' cheud choinneimh bhliadhnail—agus an té mu dheireadh.

“**A** mhnathan agus a dhaoin uaisle, tha e a' toirt toileachaidh, gu dearbh *fìor* thoileachadh, dhòmhsa, a bhith a' cur mu'r coinneamh mo chiad aithisg bhliadhnail mar rùnaire Comunn Gallda Dhuisdeil Mhóir agus Dhuisdeil Bhig, Aonaichte. Tha mi cinnteach gun aontaich sibh uile gum bu mhath an cèum a ghabh na fògaraich a dh'fhàg Duisdeal Mhór, agus Duisdeal Bheag, nuair a chuir iad air chois an comunn ùr so an uiridh.

“Tha cuimhne agaibh mar a bha na Gàidheil eile ud, mas e Gàidheil a th'annta, ag ràdh ruinn gu robh comunn gu leòir anns a' bhaile so mar thà. A bheil iad a' smaointeachadh gun dì-chuimhnich sinn mar a rinn iad ruinn aig an céilidhean-san, a' coimhead oirnn uaireannan mar choigrich; agus uaireannan eile, feumaidh mi aideachadh, mar naimhdean? Ciamar a b'urrainn muinntir Dhuisdeil a bhith riaraichte leis a' bhiadh—an dà chuid biadh spioradail agus biadh làitheil—a bha acasan aig an cuid coinneamhan? B'ann dìreach 'na àm a fhuair sinn cothrom a bhith a' cruinneachadh mar so, gu bhith a' seinn òrain Dhuisdeil—òrain a tha fada os cionn òrain eile am bàrdachd 'san ceòl, agus a bhith a' gabhail dà chupa tea agus dà bhonnach mhillis an àite aon chupa agus aon bhonnach mar a tha aca aig na coinneamhan a dh'ainmich mi.

“Nach minig a bha sibh air ur claidh ag éisdeachd ris a' Ghàidhlig leibidich a bh'aca. Rinn sinne anns a' chomunn so, gnothach mór ann a bhith a' cumail fuaran na cànan glan rèidh mar bu chòir dhith a bhith. A nise, tha mi a' dol a dh'innseadh dhuibh rud a chòrdas ruibh. Bha mi a' dol a sgrìobhadh òrain do'n chomunn so. Cha robh de dh'ùine agam ach na chuir crìoch air a' cho-sheirm, ach an uair a dh'innseas mi dhuibh gun tug mi ceithir-la-déug air, aontaichidh sibh gum feudar gu bheil e math. So agaibh e—

“Deagh shlàinte Dhuisdeil Mhòir  
Deagh shàinte Dhuisdeil Bhig.  
Ni sibhse othail mar as còir  
Is cumaibh càch gun diog.”

“Nach e an t-àgh a chuir 'nar rathad Ceann-suidhe cho comasach 'sa tha againne 'nar ciad dol-a-mach? Tha fhios agaibh uile dé'n t-ainm a choisinn e dha fhéin mar òraidiche, agus thoireamaid meal-an-naidheachd dhà mar a rinn e an gnothach air fear-na-cathrach aig a' chruinneachadh bhliadhnail. Ghabh fear-na-cathrach da fhichead mionaid is a trì, ach ghabh ar Ceann-suidhe leth mionaid a bharrachd. Sin agaibh ùine, tha sinn an dòchas, a ghleidheas an t-àite mullaich fad iomadh bliadhna.